

Payí Jemiso eaŋinarini.

Payí rina áamá Jisasomi diŋí wikwíroarigiáyo mixí uxí dowárariŋagía náni ami ami numiamoro wí eŋí nimóniro aŋí api apimi uríniŋiáyi náni Jemiso eaŋinarini. Xewaniŋo náni áwaŋí pírániŋí miriniŋí eŋagi aí “Jisasomi xogwáo, Jemisoyi riniŋoríani?” wíaiwariŋwáorini. Jisasoyá siyikí imónigiá Jerusaremi ŋweagiáyo wipeŋweagiá seáyi e imóniŋorini (Wái wurimeiarigiáwa 15:13, 21:18). Jisaso rixa aŋínami nipeyimáná xwiogwí rixa obaxí onimiápi nípwemáná eŋáná Jono áamá wí “Jisasomi diŋí wikwíroariŋwini.” niriro aí omi pírániŋí nuxídiríná epaxípi tíni xixeni mé yarigiápi náni aría niwiri náni ayí re oyaiwípoyiniri “Jisasomi pírániŋí nixídiríná epaxípi, ayí ripíríani? Ripíríani?” oyaiwípoyiniri payí rina niriri eaŋinigini.

1 ¹ Jemisoni —Nioni Gorixomi tíni Jisasi Kiraisomi tíni xináíníniŋí nimóniri omiŋí wíariŋá wonirini. Nioni payí rina gí áamá Jisasomi diŋí wikwíroarigiáyíné náni —Seyíné gwí bi bi wé wúkaú sikwí waú apíyíné wí eŋí nimóniro ŋweagiáyínérini. Ayíné náni payí rina neari yayí seawárenapariŋini.

“Iwamió neaíwapiyarigiápi eŋí neaeámixipaxírini.” uríniŋí nánirini.

²⁻³ Gí nirixímeáyíné, seyíné rixa nijíá ripi imóniŋoi. Jisasomi diŋí niwikwíroróná eŋí neániro ría xídariniŋoiniri iwamió seaíwapiyííápimi xwámámí niwíera nurónáyí, xeaniŋí ría tíŋí ríwíyo seaímeaníápimi eni xwámámí wipaxí imónipíríríni. Seyíné nijíá e imóniŋagía náni xeaniŋí xixegíni seaímeááná kíkímí mimóní “Diŋí níá neaininiápi náni ría neaímeaarini?” yaiwíríxini. ⁴ Áamá xeaniŋí wikárarigiápipimi xwámámí niwíera núíasáná imónipaxí imóniŋípi seyíné eni axípi imónipíríá náni xwámámí niwíera úírixini. E neróná Gorixo gí áamá e imónírixiniŋí wimóniŋípi bi mimúro nípini pírániŋí niyipároróminiróná wé roárinigiáyíné xixeni e imónipíríríni.

“ ‘Diŋí emí saímí mimoŋini.’ niseaimóniríná Gorixomi rixiŋí urírixini.” uríniŋí nánirini.

⁵ Síni diŋí nípikwíni émi saímí mimoariŋí go go “Xeaniŋí nímeeariŋípi, ayí api náni ría nímeaarini?” miyaiwipa nerínáyí, xewaniŋo Gorixoyá

diŋí t́ni diŋí émí saímí e mopaxí oimóniminiri omi rixiŋí uríwinigini. Gorixo áamá niyoni yaŋí niwiríná símí t́ni miwí yaŋí ewanií nimóniri xwéni mini wiarigo eŋagi náni anani rixiŋí uríwinigini. ⁶E searariŋagi aí rixiŋí nuriríná diŋí bi biaú nimori “Gorixo aga nepa niniapinirífeniŋoi? Miniapípa enirífeniŋoi?” miyaiwí aga xixeni diŋí niwikwírómáná “Nepa xixeni niapípa xorini.” niyaiwiri rixiŋí uríwinigini. Áamá diŋí bi biaú moariŋí go go rawirawáyo imeamíkwí neríná imiŋí nixemi uri nixemi biri yariŋípiŋiŋí imóniŋagi náni ⁷ámá óniŋí imónigíáyí bi re miyaiwipa éríxini, “Gorixomi rixiŋí uráná o anani niniapinirífeniŋoi.” miyaiwipa éríxini. ⁸Áamá ayí diŋí nimoróná ná bini mamó diŋí naíroayiri nero moro amiŋí eni neróná “E oemini.” yaiwííapini mé xegí bi xegí bi ero yariŋíáyí eŋagi náni e miyaiwipa éríxini.

Áamá d́wí ikeamónigíáyí t́ni amiŋí mimúrónigíáyí t́ni apiaú nánirini.

⁹Segí séríxímeá d́wí ikeamónigíáyí re niyaiwiro miŋí síŋá meakínífríxini, “Nioni Jisaso neaiŋíŋipimi dáni Gorixo seáyí e nimixiŋoniríani?” niyaiwiro miŋí síŋá meakínífríxini. ¹⁰E neri aí séríxímeá amiŋí wí mimúrónigíáyí re niyaiwiro miŋí síŋá meakínífríxini, “Nioni Gorixoyá siŋwáyo dáni sa ikwiáriniŋáoniríani?” niyaiwiro miŋí síŋá meakínífríxini. Ará siyí piyí neri piéroariŋípa ayí eni aniŋí miŋweá axípi apaxí mé pepíríá eŋagi náni rariŋini. ¹¹Seyíné niŋíárini. Sogwí xaíwí niwepíniri naniríná ará yeáyí yikiáráná xegí siyípi piyí neri nipiérinowiríná xámi awiaxí imóniŋípi sini mimóní xwiríá inariŋíri. Áamá amiŋí wí mimúrónigíáyí eni “E neríná ámi bi t́ni bi t́ni nímeapaxíri.” yaiwiarigíápi sini nixída nuróná sini mé nero axípi e pepíríárini.

Íwí oépoyiniri wímeaariŋípi náni uriŋí nánirini.

¹²Áamá Gorixomi xídariŋagía náni xeaniŋí wímeaariŋí nipimini xwámámí niwiéra núásaná eŋáná Gorixo yayí niwimori diŋí niyimiŋí imóniŋípi —Api náni niriríná “Áamá nioni diŋí sixí niyarigíá giyí giyo míni wimíárini.” riniŋípirini. Yayí niwimoríná diŋí niyimiŋí api sixí umímoníá eŋagi náni áamá xeaniŋí wííáyo xwámámí yariŋíáyí Gorixoyá diŋí t́ni yayí wipaxíyíri. ¹³Áamá xeaniŋí wímeaariŋá re mirípa éríxini, “Gorixo nioni íwí oeniri xeaniŋí api níwapiyíri.” mirípa éríxini. Ayí ripi nánirini. Gorixo áamá wí xíomi íwí oeniri wíwapiyipaxí mimóniŋorini. Xíó eni áamáyo íwí oépoyiniri wíwapiyariŋomani. ¹⁴Oweoi, nene newaniŋene wine wine pípi náni níneaimóniríná íeapá níneainiriŋíŋipimi dáni íwí oépoyiniri nearípeaariŋíri. ¹⁵Apiŋí niaíwí agwí neri xirariŋípa íeapá neainariŋípi niaíwí agwíniŋí neri íwí ayí niaíwíniŋí xirariŋwári. Íwí ayí niaíwíniŋí níxirimáná niaíwí xwé iwiaroariŋípa íwí yárfwápimi dáni niŋerane aníŋariŋwári.

¹⁶ Gí niriixímeáyíne, diñí sixí seayináyíne, nioni re seariápi, “Seyíne íwí oépoyiniri seaíwapiyariñípi pípimi dáni maríái, apimi dáni seaíwapiyariñírini.” seariápi píni niwiáriro yapí méwapínipani. ¹⁷ Pí pí naní imóniñípirani, pí pí awiaxí imóniñípirani, gimi dáni maríái, añínami dánini neaímeeariñírini. Ápo Gorixo —O pí pí añínami wía ónaríñípi náni mfkí ikiñorini. Sogwí onapámigi niniríná sepiá imóniri ripíwí imóniri yariñípa nimóniri ámi xegí bi imóniri xegí bi imóniri yariñomani. Oni amipí awiaxí imóniñípi anipá neaiapariñírini. ¹⁸ Amipí o imixiñípi nipimini dáni ná bini ayí nene aiwá niwákwiní miníñiñí oimónípoyniri xewaniño “E éimigini.” wimóniñípimi nixídiniri oyá xwiýiá nepa imóniñípimi dáni nene neameañírini.

**“Xwiýiápi xixeni aríá niwiro neróná ripi
ripi yariñíarini.” uriñí nánirini.**

¹⁹ Gí niriixímeáyíne, diñí sixí seayináyíne, api nipini nioni seariápi seyíne rixa niñíá imóniñagía aiwi ripi osearimini. Aríá owianeyiniro siñwí naniro aí apaxí mé niwiápnimearo xwiýiá miripani. Wikí eni añíni mónipani. ²⁰ Ámá wikí nóniro neróná wé róniñí Gorixo wimónariñípi tñi xixeni miyárarigíá enagi náni rariñini. ²¹ Ayináni segí íwí sini yayarigíápi —Bi náni “Onimiárini.” yaiwiaríñagía aiwi nipini piaxíniñí seaéanariñípirini. Api nipini emi mimeámí nero seáyi e mimónipa neróná xwiýiá ámá aiwá iwíá urarigíápa segí xwióxíyo Gorixo iwíániñí seauráriñípimi —Xwiýiá api seaeríkimeapaxí imóniñípirini. Apimi nimíminiro “Píráníñí oxídimini.” yaiwírixini. ²² Yapí néwapíniro “Xwiýiá api aríáni niwiranéná apáni yariñwini.” miyaiwí “Api pí pí riniñípi tñi xixeni oxídaneyi.” niyaiwiro xixeni e érixini. ²³ Ayí ripi náni searariñini. Ámá xwiýiápi aríá niwiro aí xixeni méiáyí, ayí ámá xixíeáyo gí símimañí arige ría imóniniri siñwí onimiápi ainenío yapi imóniñoi. ²⁴ Xegí símimañíyo xixíeá tñi siñwí nainenimi numáná apaxí mé “Gí símimañí e ría imónini?” yaiwípi náni aríá ikeamoariñorini. ²⁵ E neri aí ámá ñwí ikaxí awiaxí imóniñípimi —Api íwí yariñwápimi dáni gwíniñí neayáriníñípi neaíkweawáripaxí imóniñípirini. Ámá apimi aniñí siñwí agwí niwiniro xídarigíáyí óniñí wí mimóniñoi. Aríá niwiróná diñí aríá mikeamó pí pí riniñípi tñi xixeni nixídiro yaríná Gorixoyá diñí tñi yayí winipaxí imóniñípi wímeaníarini. ²⁶ Ámá wo xegí mañíyo dáni nisaniri mirípa neri aí “Nioni Gorixomi pírániñí nixídiri yariñáonirini.” niyaiwinirínáyí, xewaniño yapí éwapínarini. Xewaniño “Gorixomi pírániñí nixídiri yariñini.” niyaiwiniri yariñípi eni rániñí imónini. ²⁷ Ámá negí ápo Gorixo “Ayí siyikwí míní egíáyí nioni pírániñí nixídaríñoi.” wiaiwiaríñíyí ripi yariñíarini. Uyípeayí ikeamónariñagía niwiniróná arirá wiwo apixí aníwa ikeamónariñagía niwiniróná arirá wiwo ayá udunipaxí ámá Gorixomi mixídarigíáyí yariñíaripi nene eni xe oneaxímeaniri miyaiwipa ero yariñíarini.

“Wíyo wé íkwiaŋwíyo uŋwiráŋŋ wíyo paimimí wiro mepani.” urinjí nánirini.

2 ¹Gí nixixímeáyíne, seyíne negí Áminá Jisasi Kiraisomi —O Gorixo níxíniri ŋweaŋŋipi tñi xixeni nimóniri ŋweaŋŋorini. Omi diŋj níwikwíroróná seáyí e imónigíáyo wé íkwiaŋwíyo uŋwiráŋŋo sipí imónigíáyo paimimí wiro mepa érixini. ²Ayí ripi searariŋini. Seyíne Gorixomi yayí wianiro nání awí eánigíe áamá waú —Wío amipí wí mimúroniŋorini. Rapirapí awiaxí niyíniri wé ramaxí síŋá gorí tñi imixiniŋwá íkíkí ninimáná íwiapíorini. Wío amipí mayí sa ikwiáŋŋinjí imóniŋorini. Rapirapí kíyí óí miní yáŋjú niyínimáná íwiapíorini. ³Awaú íwiapáná seyíne rapirapí awiaxí yíniŋomi ayá tñi yayí níwiro “Símí re íkwiaŋwí naŋj imóniŋj rinami ŋweai.” uriro amipí mayí sa ikwiáŋŋinjí imóniŋomi “Xwíá yáni jéŋani, negí sikwí tñj rerani, ŋweai.” uriro nerónáyí, ⁴“Apimi dání meyrónipa yariŋwini.” riseaimónarini? Oweoi, sewaniŋyíne rixa neyróniro “Wiene seáyí e imóniri wiene sipí imóniri eŋwini.” niyaiwiróná áamá opisí aŋjyo dání xwirixí yaríná eyíroarigíáwa diŋj ínimi níkwíronimáná eyíroarigíápa seyíne eni axípi diŋj ínimi níkwíronimáná eyíronariŋowa. ⁵Gí nixixímeáyíne, diŋj sixí seayiniŋyíne, aríá nípoyí. Gorixo áamá xíoyá imónírixiniŋi íá niyamixiríná áamá xwíá tío dánj niyíyá siŋwíyo dání áamá amipí mayí sa ikwiáŋŋinjí imónigíáyí diŋj níwikwíroriniŋipimi dání amipí Jisaso neaiŋŋipi wí mimúronigíáyí imónipíría nání íá muyamixipa eŋŋrani? Ayí xegí xwioxíyo —E áamá xíomi diŋj sixí uyarigíáyo “Niŋweapíríŋini.” urinerini. E ŋweáŋŋiniŋi íá muyamixipa eŋŋrani? ⁶Seyíne e neróná áamá sa ikwiáŋŋinjíáyo ayá wimoarigíáŋini. Áamá xeaniŋj niseaikáŋŋo xwirixí oumeaneyiniŋo eŋj nápémi nuro opisí aŋj tñj e seawáŋŋinjíáyo giyíŋini? Ayí áamá amipí xwíá re weŋŋipi wí mimúronigíáyí menirani? ⁷Ayí eni yoí naŋj seyíne Kiraisomi xídariniŋá nání seawáŋŋinjíáyo ipimi ikayíwí mumeariŋa yariŋŋrani? ⁸Seyíne ŋwí ikaxí negí mixí ináyí Jisaso neariŋj Bikwíyo re niriniri eániŋj ripi, “Jiwaniŋoxi nání diŋj sipí inariŋápa áamá siŋwí winí giyí giyo eni axípi wírixini.” niriniri eániŋj api xixeni níxídirónáyí, naŋj yariŋjoi. ⁹E niseariri aí seyíne áamá seáyí e imónigíáyo pírániŋj umero sipí imónigíáyo paimimí wiro nerónáyí, íwí nero ŋwí ikaxí riniŋŋipi wiaŋŋariŋigíáyíne eŋgá nání apimi dání xwíyíá meáŋŋipaxíŋini. ¹⁰Ayí ripi nánirini. Áamá ŋwí ikaxí riniŋj nípimíni pírániŋj oxídiminiŋi nemáná ná bimíni níwiaŋŋirínáyí, xwíyíá áamá ŋwí ikaxí nípimíni wiaŋŋíáyí meáŋŋiápa axípi e meáŋŋipaxíŋini. ¹¹Ayí ripi nání searariŋini. Bikwíyo ŋwí ikaxí re niriniri eániŋj ripi, “Meániŋigíáyíne íwí minipani.” riŋo, ayí ŋwí ikaxí “Níwíáŋŋimeari áamá mipikipani.” eni riŋŋigini. Seyíne meániŋigíáyí tñi íwí minipa nero aí níwíáŋŋimearo áamá níŋŋirínáyí, ŋwí ikaxí riniŋŋipi wiaŋŋíáyíne imóniŋgá nání rariŋini. ¹²Ayináni

pí pí seyíne nerónárani, nirirónárani, re niyaiwiro diŋí t́ni érixini, “Ŋwí ikaxí riniŋípi —Apí íwí yariŋwápimi dáni gwíniŋí neayárininiŋípi neaŋkweawáripaxí imóniniŋípirini. Ŋwí ikaxí riniŋí apimi dáni Gorixo eyeyírómi neainíárini.” niyaiwiro diŋí t́ni érixini. ¹³O ámayo eyeyírómi niwiríná áamá wigí wíyo ayá murimixí wiarigíáyo x́o eni ayo ayá murimixí xixeni xwiyíá umeáriníá eŋagi náni rariŋini. E neri aí wigí wíniyo ayá nurimixiri wiarigíáyo x́o eni ayo ayá urimixáná apimi dáni xixeni roayíronipíríárini.

**Ámayo arirá miwipa neróná “Gorixomi diŋí
wikwíroŋwini.” rinarigíáyí náni uriŋí nánirini.**

¹⁴Gí nirixímeáyíne, áamá go go wíyo arirá bi miwí “Gorixomi diŋí wikwíroŋini.” nirinirínáyí, o “Diŋí wikwíroŋini.” rinariniŋípi surímá imónini. “O áamá náni diŋí sipí miwiní ‘Gorixomi diŋí wikwíroŋini.’ rariŋipimi dánini eríkiemeánipaxírini.” riseaimónarini? Oweoi. ¹⁵Segí sérixímeá wo ámi wo iyá nánirani, aiwá síá ayimi ninípi nánirani, díwí ikeamónariŋagi niwiniríná ¹⁶amipí x́o díwí ikeamónariŋipí bi mini miwí re nurirínáyí, “Joxi ‘Niwayiróniri oŋweani.’ nimónarini. Joxi nuri ríá risínini náni iyá pániri agwí ími riyini náni aiwá niri ei.” nurirínáyí, “Amipí x́o díwí ikeamónariŋipí náni xwiyíá e uríápi anani arirá wipaxírini.” riseaimónarini? Oweoi, rániŋí imóniniŋípi urarini. ¹⁷“Gorixomi diŋí wikwíroŋini.” rariŋipí eni axípi imónini. Ámayo arirá miwí sa apini nirirínáyí, diŋí wikwíroariŋí api rixa íkwíkwí yini. ¹⁸E neri aí áamá wo re niriníárini, “Áamá wí Gorixomi diŋí niwikwíroríná ámayo arirá wiariniŋagía aiwi nioni ámayo arirá miwí Gorixomi diŋíni niwikwíroríná ‘Ayí ananirini.’ nimónarini.” Áamá wo e niriníá eŋagi aí nioni omi re urimíárini, “Joxi ámayo arirá miwí ‘Gorixomi diŋí wikwíroŋini.’ rariŋipí nioni ‘O nepa diŋí wikwíroni.’ siaiwimi náni arige níwapiyíáná ‘Neparini.’ yaiwimíni?” nuriri ámi re urimíárini, “Joxi ‘O “Gorixomi diŋí wikwíroŋini.” rariŋipí neparini.’ niaiwiri náni ámayo arirá wiariniŋipimi dáni síwapiyíáná ‘O nepa diŋí wikwíroni.’ niaiwiríni.” nuriri ¹⁹re urimíárini, “Joxi diŋí re niyaiwiri ikwíroŋini, ‘Ŋwíá imóniŋo, ayí ná woni Gorixorini.’ Joxi diŋí e niyaiwiri níkwíroríná naŋí yariŋagi aiwi ripí náni eni diŋí rimoniŋi? Imíóyí eni diŋí axípi niyaiwiro níkwíroro aí Gorixo ríá ikeáriníá eŋagi náni eŋí óí ikárinariŋíárini.” nuriri ²⁰re urimíárini, “Majimajíá ikárinariŋí roxini, ámayo arirá miwí ‘Gorixomi diŋí wikwíroŋini.’ rariŋipí ‘Surímá ríá imónini?’ miyaiwipaxoxirani? ²¹Eŋíná negí arío Ebiríamo sekaxí Gorixo urípi t́ni xixeni xegí xewaxo Aisako síŋá íráí noga peyiniŋe dáni ridiyowá eminiri yaríná Gorixo o e éipimi dáni ‘Wé róniŋorini.’ miráripa reŋiniginí? ²²Ayináni nene diŋí re yaiwipaxírini, ‘Ebiríamo Gorixomi diŋí niwikwíroríná diŋíni wikwíroŋímani. Gorixo uriŋipí xixeni neríná

wikwíronjé eḡagi náni diḡi o wikwíronjipi xewaniḡo aríá niwiri eḡípimi dáni yóí imóniḡirini.’ yaiwipaxírini. ²³Ripi eni yaiwipaxírini, ‘Negí arío e neríná xío náni Bikwíyo re niriniri eániḡi ripi, “Ebiríamo Gorixomi diḡi wikwíróagi náni ‘Wé róniḡi imóniḡorini.’ yaiwiḡinigini.” niriniri eániḡipi xixeni imóniḡinigini. Ayináni Ebiríamo Gorixo tíni nikumixiniri emeariḡi woyi ragíaríani?’ yaiwiáripaxírini.’ urimíarini. ²⁴Agwi seyíne niḡá re imóniḡoi, “Ámá ‘Nioni Gorixomi diḡi wikwíronjini.’ rariḡípimi dánini Gorixo ‘Wé róniḡorini.’ rárariniḡimani. Xíomi diḡi niwikwíroríná xío wimónariḡipi yariḡípimi dáni ‘Wé róniḡorini.’ rárariniḡirini.” Api náni seyíne rixa niḡá imóniḡoi. ²⁵Eḡiná iyí ede dáni wagíá Rexpáiyi riniḡi —Í Josuao ámá waú aḡi apimi siḡwí owináriḡiyiniri urowárenapáná nipemeámi nuri óí wíyo urowáriḡirini. Í eni axípi Gorixomi diḡi niwikwíroríná e éípimi dáni Gorixoyá siḡwíyo dáni apixí wé róniḡi mimónipa reḡinigini? ²⁶Ayináni re ripaxírini, “Ámá diḡipi sini sixí míniḡáná waráo piyí eḡpa ámá Gorixo e érixiniri wimóniḡipi mé diḡipini wikwíroariḡápi axípiḡiḡi nimóniri íkwíkwí yini.” ripaxírini.

“Pí pí xwiyá rariḡwápi naḡini ríwanigini.” uriḡi nánirini.

3 ¹Gí niriḡimeáyíne, Gorixo ámá wíḡi wíniyo uréwapiyariḡíayo yariḡi imimí niwiríná awayini miwí eníá eḡagi náni segíyí wí obaxí ámáyo ouréwapiyaneyiniro mimónipa érixini. ²Nineneni pírániḡi oyaneyiniri éwáyí nóreámioarane sipíni ikárinariḡwá aí ámá maḡpá tíni niriḡíná móreámioapa nerínáyí, Gorixoyá siḡwíyo dáni rixa wé róniḡi imóniḡorini. Pí pí íwí feapá winiminiri yariḡipi náni eni anani íá yamixinariḡorini. ³Nene osí imani ouniri neríná yariḡwápi náni diḡi omoaneyi. Ainixí onimiá bi xegí maḡyó síwí íkwirároriḡwápimi dáni ḡimini ge ouniri kinimixáná maḡni maríái, osí noni eni ámini wariḡirini. ⁴Ai sipixí eni xwé imóniri imiḡi eḡi eániḡi neríná nixemi uri yariḡagi aiwi omiḡi meariḡo “Ámini ounini.” niwimóniri pará onimiápi tíni aí ámini méáná ámini wariḡirini. ⁵Negí maḡyí eni axípi imónini. Wará nirimini náni onimiápai eḡagi aí apimi dáni ámá “Seáyi e imóniḡi api epaxonirini.” niriḡo mixí meakíninariḡári.

Ai ríá bi onimiápi miroáriagi aiwi íkíá xwé bi nipini ríá nowáripaxírini. ⁶Negí maḡyí ríaniḡi weariniḡyirini. Sipí bi onimiá maríái, ayá wí epaxíyirini. Negí warárimi wí e eḡagi aiwi wará nirimini xwiríá neaimixariḡyirini. Ríá negí maḡyó dáni weariniḡipi —Api pípimi dáni maríái, sa ríá xwé Seteno weníarími dáni miróniḡipirini. Api amipí nene oníná dáni néra yariḡwápi rímiḡeniḡwíniḡi neaeánariḡirini. ⁷Ayí ripi searariḡini. Xámi naḡwí xixegíni ayí ayí, sírani, iḡirani, agwíarani, iniḡyó yariḡyirani, ámá iwí oimóniri yapemixáná ayí iwí imónagiḡirini. Agwi eni nene iwí oimóniri yapemixáná anani iwí imónariḡi eḡagi aí ⁸ámá go naḡwí sayí yapemixariḡíapa xegí maḡi eni oyapemixinininiri neríná xixeni e epaxí imónini? “Gí maḡi aniḡi

samiñí niwíriri nira úimigini.” niyaiwiri aiwi wí e epaxí mimónini. Mañíyí sipí nání neríná kikiáá bi yariñimani. Sidiñí áamá piyí omimí yariñipi magwí ínini. ⁹Mañípa tñi negí Áminá imóniñí ápo xwéomi yayí wirane áamá xióniñí nimóniri ñweáírixiniri neaimixiñene wíniyo ikayíwí urirane yariñwáriní. ¹⁰Ayínání mañí axípámi dání yayí wirane ikayíwí urirane yariñwáriní. Gí niriñimeáyíné, “Nene e neranéná ayí apánirini.” riseaimónarini? ¹¹“Iniñí simiñí siririkí axíyimi dání nañí wú meari piyanñí eariñí wú meari epaxírini.” riseaimónarini? ¹²Gí niriñimeáyíné, “Íkiá pikí winami dání sogwí oripí wepaxírini.” riseaimónarini? “Wainí uraxí wirimi dání íkiá pikí sogwí wepaxírini.” riseaimónarini? “Iniñí simiñí iwamá tñí meariñí wúmi dání ámi iniñí nañí wepaxírini.” riseaimónarini?

**Áamá diñí émi saímí Gorixo tñími dájipi
moarigiáyí yarigiápi nání uriñí nánirini.**

¹³“Nioni diñí émi saímí mori niñí imóniri eñáonirini.” yaiwinarigiá giyí giyí nene “Ayí wigí yaiwinarigiápi tñi xixeni iyí rimóniñoi?” waiwianíwá nání woxini woxini nemeñná awayini nimónimáná nañí ero diñí émi saímí nimómáná nañí ero yarigiápimi dání api nene neañwapiyírixini. ¹⁴E neri aí segí xwioxíyo dání wíyo sipí diñí ayá wí ríá tñí waiwiro nionini seáyi e oimóniminiri imimí wiro nerónáyí, diñí xejwí e nimoróná seyíné nepa imónigiápi rití niniro mixí mimeakínipa érixini. ¹⁵Áamá wigí wíniyo sipí e niwikáiróná “Diñí émi saímí nimorane yariñwini.” yaiwinarigiápi, ayí añínami ñweañoyá diñíyo dání niyaiwiro yarigiámani. Diñí áamá Gorixomi mixídarigiáyo dání imóniri áamá Gorixo nání diñí wí mimó wiwaniñíyí nánini mónarigiáyo dání imóniri eñipirini. Obíyíyáyo dání eni imóniri eñipirini. ¹⁶Ayí ripi nání searariñini. Áamá wigí wíniyo sipí diñí waiwiro nionini seáyi e oimóniminiri imimí wimixiro yarigiáyí eñánáyí, áamá píraníñí miñweá uyíniñí nero sipí xixegíni néra warigiá eñagi nání searariñini. ¹⁷E neri aí áamá diñí émi saímí añínami dájipi nimoro yarigiápi aga xegí bi imóniñagi nání ayí ripi yarigiáriní. Xámi siyikwí míní ero wigí wíniyí tñi xepixepá miróní mepi tñiro awayini yapeniñí imóniro wigí wíniyí xwiýíá uráná píraníñí aríá niwiro diñí yaikíroro wíniyo wá bi onimiápi miwianí xwapí ayá wí niwianiróná íkiá nañína sogwí obaxí wearíñíyí yapí nimóniro wíniyo wiwiro wíniyo símí símí e mumé nero nañí ero sipí ero mepa ero yarigiáriní. ¹⁸Áamá wigí wíniyí tñi xepixepá miróní mepi tñinariñíyí e yarigiápimi dání áamá aiwá omiñí iwíá néra warigiápa nerónáyí, wé róniñí yarigiápi aiwá xwé píripírí inariñipíniñí imóniniñoi.

**“Seyíné sipípi neríná Gorixomi símí tñi
wiarigiáyíné imóniñoi.” uriñí nánirini.**

4 ¹Segí mixí riniro mixí iniro yarigiápi mǎkí píyo dání inarigiáriní? “Api meapaxonirini.” niyaiwiro íepá seainariñipi —Api segí

xwioxíyo dáni seyíné t́ni mixíníj́ inarigíápirini. Íeapá seainarij́ míkí apimi dáni seyíné segí wíniyí t́ni mixí riniro mixí iniro yarigíá menirani? ²Seyíné amipí wí nání “Omeámíni.” niseaimóniri aí meapaxí mimónipa nero nání “Ámá opikímíni.” yaiwiarigíárini. Amipí bi síjwí íwí niwíniríná mimeapaxí nimóniro nání mixí nimépero mixí rinarigíárini. Seyíné “Pí nání nene neaimónarij́pi mimeapa yarijwárfani?” miyaiwipani. Gorixomi rixíj́ murípa nero nání mimeaarigíárini. ³E neri aí segí seaimónarij́pi nání Gorixomi rixíj́ nuriríná dij́ nanj́ nixirimáná mé segí íeapá seainarij́pi oyaneyiniri rixíj́ urarigíá enagi nání Gorixo wí aríá xixeni niseairi miseaiaparinini. ⁴Gorixomi píráni dij́ miwikwíropa neróná xídiro píni wíáiro nero nání íwíníj́ inarigíáyíné, seyíné níj́á ripi sini mimónipa rejoi, “Ámá Gorixomi mixídarigíáyí t́ni nawíni nikumixiniro emearigíáyí, ayí Gorixoyá símí t́ni inarigíáyí wí imóníjoi. Ayináni giyí giyí ‘Ámá Gorixomi mixídarigíáyí t́ni nikumixinimi oememini.’ niwimóniríná wiwaníjýj́ Gorixo t́ni símí t́ni inarigíáyí imixinarijoi.” Seyíné níj́á api sini mimónipa rejoi? ⁵Seyíné dij́ re riyaiwiaríjoi, “Bikwíyo re niriniri eáníj́ ripi, ‘Gorixo xegí kwíyí negí xwioxíyo sixí neayíj́pimi píráni susíníj́ memearíj́rini.’ Bikwíyo e niriniri eáníj́pi surímá rinini.” riyaiwiaríjoi? Oweoi, Gorixo xegí kwíyíj́pí ámá xío t́ni símí t́ni inarigíáyo wí wipaxí mejagi nání rarijini. ⁶E niseairi aí Gorixo ayá nineawianiríná xwapí ayá wí neawianarijagi nání Bikwíyo re niriniri eánini, “Wárixá imónarigíáyo Gorixo pírf rakiri ámá ‘Siyikwíníj́ imóníjwini.’ yaiwinarigíáyo wá wianiri yarijorini.” eáníjagi nání ⁷Gorixomi simanjwíyóníj́ yeáyí wuríniro obo xórórí neainiginiri xaíwí éf níro o t́ni mixíníj́ iniro éfrixini. O t́ni mixíníj́ inaríná éf niseanimi uníárini. ⁸Seyíné Gorixo tíámíni úfrixini. E nerínáyí, xío eni seyíné tíámíni biníárini. Ámá íwí yarigíáyíné, seyíné “Arige neri Gorixo tíámíni uminiréini?” niseaimóniríná síkí wéyo xéníjáná okwíríniminiri igíá eánarigíápa axípi nero segí íwí yarigíápi eni okwíríniminiri igíá eánípoyi. Ámá dij́ bi biaú xirigíáyíné, seyíné “Arige neri Gorixo tíámíni uminiréini?” niseaimóniríná saxí síkí mayí oíniri yarijwápa segí xwioxíyo eni dij́ sipípi t́ni nixiriri yarigíápi api eni sini neainiginiri saxí síkí mayí inarij́páníj́ imixinípoyi. ⁹Segí íwí yarigíápi nání dij́ sipí niseairi xwiríá nimóniro jweápoyi. Ripíá seyíné rarigíápi píni niwíárimáná segí íwí yarigíápi nání ámixíá époyi. Dij́ níá seainarij́pi píni niwíáiro kipíj́ yinípoyi. ¹⁰Gorixoyá síjwíyo dáni siyikwípiayínéni j́ imixinípoyi. Seyíné e eánáyí, o seamíeyoaníárini.

“Sérixímeáyo xwiýíá mumearipani.” uríj́ nánirini.

¹¹Gí nixímeáyíné, seyíné xwiýíápai miwjírínipa éfrixini. Ayí ripi nánirini. Ámá giyí giyí xexímeáyo xwiýíápai niwjírírónárani, xwiýíá numearírónárani, ayí ayoni murarijoi. Jwí ikaxí Jisaso riáj́pimi

eni xwiýíapai ŋwiráriro xwiýíá “Ayí nipikwini mirinini.” umeariróniŋi yariŋoi. Ŋwí ikaxí riŋípimi xwiýíá numearirínáyí, ŋwí ikaxí riŋípi t́ni xixeni mé xwiýíá umeararigiáyíné nimóniri yariŋoi. ¹² Ámáyo ŋwí ikaxí uriri xwiýíá umeariri epaxo, ayí ná woni Gorixorini. Ámáyo yeáyí uyimixemeari xwiríá wikixeri epaxo ná woni o eŋagi aí “Negí wíniyo xwiýíá umearipaxenerini.” yaiwiarigiáyíné giyínériani?

“Mixí mixínipani.” uriní nánirini.

¹³ Ámá Gorixo náni diŋi mimó re rarigiáyíné, “Agwirani, wíárínarani, aŋí xwé apimi náni nurane xwiogwí wo e niŋwearanéná kodireakí nerane nigwí xwé meaníwáriní.” rarigiáyíné píráníŋi aría nípoi. ¹⁴ E rarigiáyíné wíáríná seaímeaníapi náni níjía nimónimáná rirariŋoi? Seyíné píniní imóniŋoi. Seyíné siŋwiríá xeniaŋwí yariŋipíniní imóniŋoi. Bi onimiápi niŋweámáná apaxí mé anipá imónarigiáyínerini. ¹⁵ Ayináni seyíné e miripa nero Gorixo náni diŋi nimoro ripini nirirónáyí, “Ámináo xe niŋwearo oépoiŋiri siŋwí nineanirínáyí, nene ámi síá wí t́ni niŋwearane ripi yaníwárfani? Ripi yaníwárfani?” nirirónáyí, ayí ananirini. ¹⁶ E niseariri aí wárixayíné nimónimáná e wí mirí mixí ḱnariní. Mixí ḱnarigíá apíniní imóniní nipini sipírini. ¹⁷ Ayináni ripi osearimini, “Ámá níjía re nimóniro aiwi, ‘Nioní naŋi imóninípi neríná ayí e epaxírini.’ Níjía e nimóniro aiwi api e mepa yarigíá giyí giyí, ayí rixa íwí nero náni xwiýíá meárinipaxípi yariŋoi.” osearimini.

Amipí wí mimúrónigíáyo erirí wiŋi nánirini.

5 ¹ Agwi amipí wí mimúrónigíáyo erirí bi seaimípi aría nípoi. Íkíniní sipí seaipaxí seaímeaníapi náni ŋwí earo “Yeyi” riro époi. ² Ayí ripi náni searariŋini. Segí amipí ayá t́nipi rixa didímí ináririri rapirapí eni rixa kwinumiŋi nowáririri eni. ³ Síŋá gorí t́ni siripá t́ni nigiyí mikipaxí imóniŋagi aí segí awí eámeámí yarigiápi rixa nigiyí kini. Síá Gorixo ámá niyoni mí ómómiximí eníáyimi nigiyí kiní api segí sipí níwiéra warigiápi siŋáni piaumimí eri ría íkíáyo nowárarinípa segí waráyo eni nowáririri eníáriní. Síá yoparíyí t́ni ríná amipí ayá t́nipi t́ni nigwí t́ni mimeámí yárariníagi aí ⁴ píráníŋi aría nípoi. Nigwí ámá omiŋi seaiarigiáyí t́ni aiwá seamiiarigiáyí t́ni nigwí omiŋi seaíáná “E seaipaniwáriní.” nuriro yoí urigíápi —Api niwiróná bi niwákwiwo sini íá xirarigiápirini. Api ráiawá réniŋi rinarini, “Ámá ayí sipí e yarigíáriní. Sipí e yarigíáriní.” Ríaiwá éniŋi rinariŋipi Gorixo —O aŋinami dání simiŋi wínigíáwayá Ámináorini. O rixa aría wini. ⁵ Amipí wí mimúrónigíáyo, seyíné xwíá t́yo niŋwearóná sirí muni niŋwearo pí pí segí íepá seainariŋipimi dánini néra warigíáriní. E neróná ámá odipí iwaní eŋi wimi náni oimóniri aiwá xwé niwiro imixarigiápa síá Gorixo xwiríá seaikixeníáyí aŋini oneaímeaniri sewaniŋiyíné axípi e imixinariŋoi.

6 Ámá wé róninjí yarigíáyo seyíné xwiyíá numeáriro pikiarinagía aiwi wíniyí eni wí pírfí searakianiro miyarinjoí.

**“Dinjí sixí nínirane Ámináo náni weninjí neri
ñweáwanigini.” urinjí nánirini.**

7 Ayináni, gí nixímeáyíné, Ámináo xegí dinjí tíni ófí neaimówiniginiri xífo weapíné náni weninjí nero ñweáfrixini. Aiwá ominjí yarigíáyí aiwá iwíá nurárimáná yarigíápi náni dinjí mópoyí. Iniá eari sogwí aniri neríná aiwá xwé imixiníá náni weninjí neri ñijwearíná yófí neri xegípi ófíninjí oneaimoniri weninjí neri ñwearigíáriní. 8 Ámináo weapíníáyí aŋwí ayo eŋagi náni seyíné eni axípi xe ófí oneaimówiniginiri dinjí sixí níniro weninjí nero ñweáfrixini.

9 Gí nixímeáyíné, Ámináo xwiyíá mineameáripa éwiniginiri aninjúmfí ikaxí mirinipa éfrixini. Ai eyeyírómfí ñineairíná xwiyíá neameáripaxí imóninjo aŋjini bñimiginiri rixa íwí e rónapinagí náni rarinjini.

10 Gí nixímeáyíné, wíá rókiamoagíáwa —Awa Ámináo xegí xwiyíá onurimeípoyniri urowárenapáná ñiŋwíro oyá xwiyíápi wuriyigíáwarini. Awa ámá wí xeaninjí wikáráná xwámámí ñiwiróná egíápi seyíné náni siŋwepigí seaigíá eŋagi náni axípi e nero xídípoyi. 11 Ai Gorixomi dinjí wikwíroŋwaéne dinjí re yaiwiarinwáriní, “Ámá eŋinaŋjí xeaninjí wikáríagía aí xwámámí wíááyí Gorixoyá dinjí tíni yayí winipaxí imónigíáyíriní.” yaiwiarinwáriní. Seyíné Jopo yagípi náni rixa aríá ñiwíro omí xeaninjí ñiwíera úfápi ñiwíera núsáná eŋáná Ámináo ámi naŋjí wíláná wímeaŋjipi náni nene ñijá e imóninagwí náni re yaiwinjwini, “Ámináo ámá náni wá wianiri ayá urimixiri neríná bi onimiápi ayikwí miwí ayá wí wiarinorini.” yaiwinjwini.

“Síná romí dání rirarinjini.’ muripa éfrixini.” urinjí nánirini.

12 Gí nixímeáyíné, amípí seararinjipi “Oxidípoyi.” ninimóniri aiwi ripi aŋipaxíriní. “Nepa ñirariní.” oyaiwípoyniri nuriríná aŋjnamí dánirani, xwíárimí dánirani, amípí wíyo dánirani, aga muripa éfrixini. Seyíné nioni e searíá apimi dání ráná Gorixo pírfí seamamoniginiri ámáyo “Nemíini.” nuriróná apini urífrixini. “Nemiméini.” nuriróná apini urífrixini.

Gorixomi aninjí miní rixinjé urífrixiniri urinjé nánirini.

13 Segíyí go go ríninjé ñimearínáyí, Gorixo arirá oniniri rixinjé uríwiniginí. Segíyí go go dinjí níá ñiwínirínáyí, Gorixomi yayí numeri sonjé umearíwiniginí. 14 Segíyí go go simixí ñiwérínáyí, Jisasoyá siyikí imónigíáyíné seaipeŋweagíáwami “Eini.” urífrixini. Awa ñiŋwíro Ámináooyá dinjí tíni ámi wará oinini rixinjé wuriyi ro raní bi tíni xwíá earo éfrixini. 15 Awa rixinjé nuriróná dinjí ñiwikwíro urarigíápi

dáni Ámináo ámi naŋí wimixiniárini. Simixo íwí bi eni enj eŋánáyí, yokwarimí wiiniárini. ¹⁶Ayináni, simixí píni seawiáriri Gorixo naŋí seaimixiri enía náni segí íwí éíápi náni waropári iniro Gorixomi xixe rixiŋí wurimeiri inírixini. Rixiŋí wé róniŋí imónigiáí wuriyarigiápi, ayí anani ámáyo arirá wipaxí enjagi náni rariŋini. ¹⁷Eníná wía rókiamoagi Irajao enjipi náni diŋí mópoyi. O áamá nenéniŋí imóniŋo aiwi iniá meapa oeniri Gorixomi rixiŋí enjí tíni uráná oyá diŋí tíni xwíá tíyo iniá meapa neri xwiogwí waú wo nipwémáná enjáná ámi emá wé wíumi dánj wo eni pweŋinigini. ¹⁸O iniá ámi oeaniri Gorixomi rixiŋí uráná iniá xwíá tíyo neari aiwá yapiniginini.

**“Sérixímeá wí xejwíni yariŋagi niwiniróná
yumixinípoyi.” uriŋí nánirini.**

¹⁹Gí nixixímeáyíné, segíyí wo áamá xegí imóniŋí wo Gorixoyá xwiyíá nepa imóniŋipi píni niwiárimí xejwíni yariŋagi niwiniri ámi Gorixo tíámimi obiniri nipemeámi nibirínáyí, ²⁰re mówinigini, “Xexirímeá íwí aríkí yariŋíyí wigí íwí yariŋípi píni niwiáriro ámi Gorixomi diŋí owikwírípoyiniri yumixariŋí go go, o ayí anínimixinaniro yariŋíapimi dáni eríkiemeánipíri náni eri íwí xwapí éíápi rití inipíri náni eri yariŋorini.” mówinigini.